

MC

VAKIRIA
MIZO FASHION
INDUSTRY

MIZO THLALATU HMASA
LALHEMA

Cruising



#mcmagselfie
CHALLENGE
WINNER INSIDE

ZOFA CHHUANAWM
LAWMNAKIMA
KAWMNA

SCRUB
TYPHUS





AVAZ RECIPE
Mission Veng,
Near Thakthing Bus Stand
Phone : 9862371379





https://www.instagram.com/mcmag_official/



<https://www.facebook.com/MovieCornerMagazine/>

contents

4 FROM THE EDITOR'S DESK
M. RALTE

5 CAMERA EDU : MANUAL LENS
DIDINI TOCHHAWNG

6 MC PEOPLE : VAKIRIA
MIZO FASHION INDUSTRY
MAWIA CHAWNGTHU

8 2018-A MOVIE RELEASE TUR KA
NGHAHHLELH ZUAL TE
ABLE AWMTEA

10 INSIDE REPORT : INDIAN FILM
FESTIVAL MIZORAM

12 BRIEF Q&A WITH THE
COVERGIRL : LOVELY
KHAWLHRING

16 ZOFA CHHUANAWM
LAWMNAKIMA KAWMNA

19 SCRUB TYPHUS
DR. C. VANKHUMA, MD

20 MIZO THLALATU HMASA
'LALHEMA' KAWMNA
DIDINI TOCHHAWNG

22 CUISINE
STANLEY

23 NATURE WATCH

MOVIE CORNER MAGAZINE

moviecornermagazine.com

EDITORIAL

Editor-in-Chief: m. ralte

Deputy Editor: mazirtira

Editor-At-Large: didini tochhawng

Associate Editors : mawia chawngthu
stanley
omoma ralte

Art Directors: ruati hrahsel
muantea chinzah
awmtea
andrew lalbiaknunga ralte

Cartoonist: Hriatpuia Cc

2018

From the Editor's desk

-m. ralte

HAPPY NEW YEAR, PEEPS!

Keini kan han buai phili teh reng nen, VIP guard hmanhmawh tak tak te'n driver hmanhmawh lem lo tak sawisakna hun an neih hman lai te, muangchanga motor hnuk tow-truck-in ruang mak danglam tak a hnuk tel hman hram lai te, political party ang zawnga inthlan lo awm tur urlawkna chaw ei khawm mai mai hman an awm lai te, state danga In sa hman khawpa hausa party hotu kan neih lai boruak inlumlet neuh neuh karah hian kumthar lawmna'n Volume III, Issue 4 kanrawn hlui leh ta hluai a che u. Chhiar a manhla dawn mai bakah, mit a tlai leh chur chur dawn hle a ni.

IT leh a kaihhnawih lama tuimi te tana hriat chakawm tak, Zofa nih tinuamtu, Pu Lawmnakima'n Cognizant chu a zawm dawn ta em? Amah kan kawmnaah a chhanna chu a awm e. Mizo Fashion Industry zinga hriat hlauh tak Vakiria bul lo inthan dan leh an chanchin te hi a bengvarthlak bawk. Tunlai hian rannung seh avanga boral ta kan awm leh thin a. Rannung seh atanga natna (Scrub Typhus) lo awm thei te hi chhiar hmaih miah loh bawk tur a ni.

He'ng te bakah hian Cover Girl kawmna te, Indian Film Festival Mizoram Report te, thlalak lama tuimi te tana hriat ngei ngei tur Manual Lens chungchang te, kumin chhunga movie release tur nghahhlehl zual te chanchin te leh ei leh in tuihnai leh tui bawk si siam dan te pawh chhiar tur a awm a bawk ni.

Chhiar leh chur chur ila, share kual leh chur chur mai ang u hmiangss...

M. Ralte





I DSLR emaw mirrorless camera emaw hman laiah khan manual lens i hman ve tawh thin em? I hman kher loh pawhin, i camera autofocus a thawh that loh emaw a chian loh emaw chang chuan manual focus i hman thin ngei ang. Videographer te phei chuan manual focus hi an hman tangkai lehzual tih chu kan chiang tlang awm hlawm e. Thla kan han lak tak tak hi chuan autofocus lens ngei hi a thain, a tangkai zawk ngei a. Mahse, hun engthawl neih laia hmanhmawh miah loa thla kan lak duh chang te hi chuan manual lens han hman te pawh hi kan pawh ti lo tlang awm e.

Third party company thenkhatin kan camera body mil turin manual lens an siam nual a; autofocus lens ai chuan a tlawm zawk tih chu a chiang mai a ni. A nih leh hmanlai lens hlui ho lei hi i lo rilruk ve tawh thin ngai em? I la ti ngai lo a nih chuan internet-ah khan han melh ve chhin teh. A bikin eBay-ah hian secondhand lei tur a tam mai a. Company hrang hrang, Nikon, Canon, Minolta, Pentax leh a dang dang te, man to lutuk loin an zuar thin a ni. ***'Eng vanga second hand manual lens fak vak ta nge i nih?'*** te pawh in ti rilru mai thei. A chhan han sawi zau zel ila. Hmanlai SLR lens hi tuna kan DLSR leh mirrorless camera tam zawkah

te hian a la hman theih vek a. Kan camera model nen a inang lo a nih pawhin adapter hmangin a la hman leh theih fo a ni. A bikin Nikon body nei tan phei chuan Nikon lens hlui te hi adapter hranpa ngai tawh loin a hman theih vek a ni. SLR lens chhuak hmasa ho kha an siam thain, a glass quality a tha em em a. Plastic-a siam phei chu a awm mang lo tih theih a ni.

Technology a lo inthlak danglam zel tawh avang hian hmanlai lens picture quality leh tone chu tunlai ami nen a inang lo ve hret hlawm a.

Hetah tak hian hmanlai manual lens tangkaina chu a rawn lang chhuak thin a ni. Tone hran a neih bik vang te hian a hranpaa edit ngai loin, tone danglam leh nalh deuh deuh te a chhuah phah theih thin a ni. DSLR nei chuan a tlangpuiin prime lens, portrait lens te neih belh kan duh thin a. Hmanlai lens hoah hian, a bikin 50mm prime lens hi manto em em loin an zuar nasa khawp mai. Lens hlui tam zawk hi hmuarin a tibuai nasa tlangpui a. Hmun danga thawn kher ngai loin, tlawm tein Aizawlah pawh a tihfaitir theih bawh a ni. Inkhualtelemna tur Camera accessory emaw lens emaw han lei belh i tum lai khan Manual lens ho chu han melh kual ve chhin teh le!

-didini tochhawng



MC People



VAKIRIA

MIZO FASHION INDUSTRY

-mawia chawngthu

Mizorama fashion industry kan sawi dawn chuan Vakiria hi sawi lan loh theih loh a ni. Kum 2005 khan unau pathum – Laldinsangi, Lalsangzuali leh Lalrinpuui te'n hnathawk pakhat nen an din tan ve mawp a. Kum sawmpahnih a liam meuh chuan hnathawk za sawm hnih (120) vel an chhawr tawh bakah, Apparel Ad Garment Manufacturing Center an nei tawh a ni. Fashion Industry hlawhtling mai ni loin, Mizormah huan business hlawhtling zing ami an ni tia chhal ngam an ni. An hlawhlinna hi thalai tam tak tana entawn tlak a nih mai bakah, a ram leh hnam ang pawha chhuan tham tak a ni.

BUL TANNA:

Kum 2005 khan 'Computerised Embroidery' tih hmingin tuna New Market-ah hian bul an tan ve nawk nawk a. Hemi tum hian mi pali chauh an thawk a; nu ho pawnfen leh Mizo puan hrang hrangah embroidery an siam a ni. Hemi hnu hian 2006 khan Zarkawtah Lalbuai Shopping Complex a lo ding a. Chumi kum vek August thlaah, chutah chuan an insawn a, hma an la

chho zel a ni. Embroidery mai khawh tawh loin, hmeichhe thawmhnaw hrang hrang an siam tel tan a. Hnathawk pawh an lak belh chho zel a ni. Kum 2008 khan Bridal lam an tan ve leh a. Hei hi tuna an peng zing a lian ber zing ami a la ni ta reng a ni. Mo kawr leh accessories hrang hrang hawh theih an neih bakah an thuisak thin bawh.

CEIFT LEH VAKIRIA

Kum 2010 khan hmalakna thar an tan leh a. Zirilaite lain puan thui an zir tir a. Computerised Embroidery Institute of Fashion Technology, CEIFT chu a lo piang ta a ni. A tirah chuan zirilai sawmhnih pali an la a. Kum khat course niin, morning leh afternoon shift-ah an then a ni. Tin, an zirilaite hi an graduation atan show lar zui ta em em, 'FASHION FUSION' chu an neihpui thin a ni. CEIFT-ah hian, a tirah chuan, zirtirtu panga an awm a – Numami, Tei, Rinpuui, Sangzeli leh Tluangpuui te an ni. Kum 2013 khan Vanlalruata (Veruata) chuan CEIFT hi a rawn zawm bawh a ni. 2010 vek hian Millenium Center ah VAKIRIA dawr an hawng a, hetah hian anmahni siam readymade garments hrang hrang an zuar a ni. Hemi atang hian **'VAKIRIA'** tih hming hi an hmang tan bawh a ni.

KUM 10 HNU LAM

2015 khan an kum 10 tlin lawmna'n online store www.vakiria.com chu an siam tan a. hetah hian an readymade garments hrang hrang an pho chhuak a, online shop dang angin order theih reng a ni.



Kum 2017 kum tir khan an hmalakna lian ber zing ami chu an tan ta a. Luangmuala Industrial Growth Center-ah khuan Apparel and Garment Manufacturing Center an din a. Hetah hian khawl tam tham tak neiin, thawmhnaw hrang hrang an siam a ni. North-East India-ah chuan Garment manufacturing center awmchhun a ni hial awm e. He center-ah hian mi sawmruk chuang hnathawk an awm a. Sportswear, T-Shirt leh school uniform lam an siam deuh ber a ni; hnathawka an lak te hi thiamna nei sa an ni lem lo. Anmahni hian training an pe a, an chhawr zui nghal zel bawh a. An product hrang hrang hi anmahniin zuar mai loin, market lamah zawrh chhawn turin an sem chhuak tan nual tawh bawh a ni.

2017 vek hian an designerte pahni - Tluangpuui leh Veruata - te chuan an chawlhan a. NIFT graduate, Mami Zote leh Atea Ngente te'n an zawm tan ve thung a ni. Mami Zote hian line thar, Vakiria Casual chu bul a tanpui a. Atea Ngente hian Vakiria Men line a tanpui thung a ni. Vakiria Men hian amahin Logo hrang te pawh a nei a. Expose 2017 khan an design hrang

hrang te pawh an showcase hial a ni. Designing bakah CEIFT lamah zirilaite an zirtir nghal bawh a. 2017 tho hian MEDMOC-in Mizoram Outstanding Entrepreneur Award an buatsaihah khan Vakiria te hian 'OUTSTANDING WOMEN ENTREPRENEUR OF THE YEAR – MANUFACTURING SECTOR' lawman an dawng nghe nghe a ni. Sumdawnna hi tih tak tak chuan hlawhtlinna a nih mai bakah, mi tam tak tan eizawnna siamsak theihna a ni tih hi Vakiria hian a tilang Chiang Hle a. Mi tam takin sumdanna changkang tak tak, ropui tak taka an tan laiin, anni unai pathum te hi chuan tlawm tein, tlo tak siin bul an tan a. Tunah chuan Fashion Empire anga chhal ngam an din tawh a ni. An hmalam hunah chuan sportswear leh school uniform lama Mizoram kan intodelh theihna'na hma lak an tum chho zel a ni. Taihmakna, changkanna leh thil thar tih ngamna inkawp te nena an sumdawnna an kalpui hian an hlawhtlinna hi thui takin a hril a ni. An hmalam hun hi a eng hle niin a hriat bawh a, Mizote tana chhuan tlak pawh an la nih chhoh zel beisei a ni. MC Magazine chuan Vakiria te an kal lehzelnah turah duhsakna sang ber kan hlan e.

2018 A MOVIE RELEASE TUR

KA NGHAAHLELH ZUAL TE *-able awmtea*



1. AVENGERS : INFINITY WAR

(May 4, 2018)

DC leh Marvel lam kan sawi lo ang; tan bik nei nih ai chuan a hmuhdawm tur lo nghah mai hi a nuam. Marvel Studio film siam tawhah chuan nghahhlelhwam tak zing ami a ni ngei ang. A changtupa hlang leh misualpa hlang awmkhawmna a ni dawn, a nep thei lo hrim hrim.



2. BLACK PANTHER

(Feb 16, 2018)


Hun rei tak chhung 'film mal khaiah a changtupaah mi hang an ni ngai lo' an tih thin chu a tawp dawn ta. Black Panther-ah a changtupa ber turin mi hang an hman ang; he mi vang kher ni loin, Creed pawh hmuhdawm taka lo siam tawhtu kutchhuak hmuh chak leh vang zawk hian en a chakawm tawh khawp mai.



3. TOMB RAIDER

(March 16, 2018)


Computer game lamah AAA game an siam tawh; naupang chhia mai kan nih lain, a film dang hmuhdawm ti takin kan lo thlir tawh. Tunah, Oscar pawh dawng tawh Alicia Vikander chu Tomb Raider thar a rawn ni dawn, a nep ring suh. A hmuhdawm ang.



4. PACIFIC RIM UPRISING

(March 23, 2018)


Robot lian tak tak, chak em em bawk si, chem vai thei, silai kap thei, insual thiam, a control-tu mihring a la ni zui. Naupan laia kan chak thin zawng zawng kha a kim a tih theih awm e. A hmuhdawm dawn riap riap khawp mai.



5. DEAD POOL 2

(June 1, 2018)

Deadpool hlawhtlinzia kan hria. Puitling fiamthu leh ñawngkam tlahawlh a tam a, kum tling chin tana hriatthiam awlsam bik a tamna lai te khan a ti Deadpool leh zual. A sequel an siam tur pawh hi a hma aiin a nep hauh lo turah ka ngai a, en a chakawm tawh hle mai.



6. JURASSIC WORLD : FALLEN KINGDOM

(June 22, 2018)

Kum maktanuaih (taduaih ni lo) a liam taa thi zo vek tawha kan ngaih te, ngaihruatna nena hmuh leh hi a nuam. A namai lo a, a nep lo. Tun ñumah pawh hian eng ti zawngin nge pre-historic nungchate hian khawvel an tihbuai leh dawn kan la hria ang chu! A nghahhlelawm tawh kher mai.



7. ANT-MAN AND THE WASP

(July 6, 2018)

Ant Man-ah khan a changtunu tur ber duh angin a lang tam lo. A tawp dawnah min chhaih deuh zuai a, tunah chhunzawm a ni dawn ta! Tun ñumah hian Wasp kan hmu tel dawn a, nalh taka rawn inlan tawh Lilly chu a rawn intheh ñhil ve tawh ang.



8. X-MEN : DARK PHOENIX

(Nov 2, 2018)

‘A ni em em tawh lo e’ kan ti pawh a ni mai thei. Jean Grey power chak em em leh thil tithei, mi pakhata mi nung pahnih awm ang hiala Prof. Xavier-a’n a sawi chu sualnain hnehin khawvel tan mi hlauhawm a lo ni ta. Eng tin zel nge a rawn inher ang? En a va chakawm tawh tak em.



9. OCEAN'S EIGHT

(June 8, 2018)

George Clooney-a’n hmuhnawm takin min lo hlui tawh a. Tun ñumah hian hmeichhe lam chhe lo tak tak hlir maiin a sulhnu chhuiin, fing leh zei taka ruk ruk lam an rawn lantir leh ang. Rihanna tel tur hian boruak te pawh a siam ngei bawh a. Anne Hathaway che tla hmuh a chakawm tawh hle bawh. A thirtute thinlung pawh an ru tel mahna le!



10. SOLO: A STAR WARS STORY

(May 25, 2018)

Star Wars Movie hmasate khan hlut a hlawh hle a. Tun hnaia an siam te hian an pha ta lo deuh emaw tih mai tur ni mah se an la hlawhtling hle tho. Tun ñumah hian Han Solo-a tun hma nun leh thil tawn te lantir a ni dawn a, Star Wars fans tan chuan hmaih chi a ni lo.

INSIDE REPORT



Mizoram sawrkar leh Innovations India thawhhona zarah a tum khatna atan Indian Film Festival Mizoram chu January 23 -25, 2018 chhung khan buatsaih a ni a. Indian film industry leh Bollywood lama sulhnu lian tak tak nei te kan hmuh phah thei a. Tin, anni pawn Mizoram an rawn hriat chian phahin, a mawina leh thatna te mit ngeiin an rawn hmu a ni. Indian Film Festival kaltlang hian Mizoram sawrkar chuan Indian filmmakers (a bikin Bollywood lam) te chu film shoot-na hmun atan Mizoram rawn hmang tura a sawm mai bakah, inkungkaihna tha zawn nei a, thawh hopui turin a sawm baw a ni.

January 24, 2018 khan Berawtlang Convention Centre-ah filmmaker te panel discussion neihpui niin, Mizoram hi hriat chiana, film shoot

ngei an duh thu leh a mawina pho chhuah an chak thu te an sawi a. Film-a han siam theih tur Mizo thawnthu te hriat belh zel an duh thu an sawi baw a ni. He'ng bakah hian Mizoramin Cinema Hall changtlung tak kan mamawh thu an sawi a. Tin, film making school emaw workshop changtlung tak emaw Mizote'n kan mamawh thu an sawi tel baw a ni. He panel discussion-ah hian Gujarati filmmaker Mikhil Musale chuan state sawrkar-in filmmaker te a support that a ngaihzia sawi langin, Gujarat state sawrkar chuan filmmaker te chawi kannan Gujarati film, National Award dawng pha film siamtute chu Rs. 1 crore lawmman a pek tur thu policy a siam a ni. Hei hian filmmaker te a chawh phurin, kawng tam tak a siam sak phah nghe nghe a ni. Hetianga Zofate tiphur thei tur sawrkar hi kan mamawh ve tak zet a ni.

Mizoram pawn lam mite tan Mizoram sawrkar hi a inhuam ang tho hian, tun aia Mizo filmmaker te chawisan leh an **hamthatna** tur hi ngaihtuah belh sak thei se a pawimawh khawp mai. Director, Screen Writer, Script Writer Cinematographer leh Technical lama mi thiam hrang hrang te kan mamawh belh mai bakah hian Mizo film, production tha leh changkang tak kan pho chhuah belh zel theihna atana mi inphal, producer tha kan neih belh zel hi a ngai tak zet baw a ni.

Khawvel intlansiakna chak tak karah hian hmasawna tur kan ngah hle a. Thiamna leh malsawm finna tam tak kan neih te hi khawvel pum hmuh leh hriat theih tura kan pho chhuah ve ngei theihna'n leh Zofate hming a lo vul zel theihna'n kan sawrkar leh thil ti thei zawkte'n kawng min hawksak hi a pawimawh em em a ni.



AS ON WEEKEND JAN 26 - JAN 28

TOP BOX OFFICE

1. Jumanji: Welcome to the Jungle
\$19.5M




2. 12 Strong
\$15.8M



3. Den of Thieves
\$15.2M



4. The Post
\$11.7M



5. The Greatest Showman
\$10.6M




6. Paddington 2
\$8.1M



7. The Commuter
\$6.6M




8. Star Wars:
The Last Jedi
\$6.5M



9. Insidious:
The Last Key
\$5.9M



10. Forever My Girl
\$4.4M



MIZO FILM COMING SOON

Expected release : End of February 2018 (Aizawl & Lunglei)



BRIEF Q&A
WITH THE COVERGIRL

Lovely
KHAWLHRING



Full Name: Vanlalhmgaihzuai
 D.O.B.: 11.11.1991
 Address: Ramhlun Venglai, Aizawl

Q. Current profession?

A: Student, Voice-over Artist, Short Film Actress.

Q. Future plans?

A: To involve myself as much as possible in the field of social work.

Q. Favourite movie?

A: Now and Then.

Q. I mi ngainat zawng?

A: Mahni nihna anga lang chhuak ngam leh dikna tanna'n chuan huai taka hma la ngam mi.

Q. Zofate hmasawwna tur ni a i hriat?

A: Midangte nuna buai tlem leh kan thil tih apianga teirei peih. Chuan, mahni hnam thil leh ziarang ngaihhlut leh chawisan thiam.

Q. MC Mag chhiartute hnena thu chah duh i neih?

A: Changkanna hi thawmhnaaw leh incheina lamah a ni lo tih hria ila. Mahni ram mil leh mahni culture hlut thiam apiang hi hnam changkang an ni tih hriain, hnathawh hreh loin, 'Zo' takin kan ram hmasawwna turin i bei zel ang u.

MAKE-UP **andrea**
WARDROBE **abby hnamte**
PHOTOGRAPHY **didini tochhawng**

#mcmagselfie challenge Winner



nghaktea_fanai
Champhai, India



728 likes

nghaktea_fanai Testing Samsung J7 Prime portrait mode.

#mcmagselfie

The winner of
the #mcmagselfie challenge is
nghaktea_fanai. Congratulations!!



₹500/-

ZOFA CHHUANAWM LAWMNAKIMA KAWMNA

Pu Lawmnakima hi Pu Zobela (L) leh Pi Kawlengi te fa pathum zinga a milai niin, Zofate zingah chuan IT khawvel lama chhuan tham khawpa nihna leh dinhmun sang chelh pha a ni. Kum 2000 khan Darlawn H/S-ah Matric Distinction-ah pass-in, Mizoram pumah 33rd position a hauh pha a. Class X-ah hian hmar tlangdung bikah pakhatna niin, a hnaih bertu chu second division a ni.

2002 kumah Government Mizo HSS, Aizawl-ah HSSLC First Division-ah pass lehin, hemi tumah pawh hian Zoram pumah 4th position a hauh mai bakah Mathematics-ah Topper a ni nghe nghe bawk a ni. Sawi hmaih miah loh bawk tur chu Class IV a nih atanga Class XII thleng hian an class-ah pakhatna a hauh tuan zak thin a ni. 2006 kumah Dr. Ambedkar Institute of Technology-ah BE (Electronics & Communication) Distinction-ah a pass leh a. 2005 kuma campus placement a lo appear tawhna Satyam Computer Services Ltd. chu Engineer a zawh veleh a zawm ta a ni.

Amah, Pu Lawmnakima i han kawm teh ang.

Q: I naupan laia i aim reng hna i thawk nge, i tum loh ram i dai ta zawk?

A: Ka aim tak chu IAS a ni a. Ka zirilaia min chawmtu ber ka U-in min boralsan tak avang leh 2009 kuma ka pa-in min boral san avangin ka zir zawh veleh chhungkaw chawmtu ka ni ta mai si a. Hnathawk chungah UPSC exam a hautak



Pic: Lawmnakima Emirates Stadium, Arsenal. IBM Global Meeting Business Intelligence ah paper a present.

si nen, tihluhnain 2010 kumah UPSC Prelims ka tlang ve a, ka exam chhunzawm zel thei ta lo a ni.

Q: I hringnun zinkawngah hian hlawhtlinna kailawn pawimawh ber hi eng nge ni a i hriat?

A: Pathian tih chungah rim taka thawh. 'God helps those who helps themselves' tih hi ka zirna dawhkanah ka tar thin.

Q: Zofate hmasawwna tur min dangtu emaw hma lam kan penna ata min kuaihertu ni a i hriat?

A: A point te te-in han sawi ila.

1. Tumruhna nasa zawk kan neih a ngai. Zirna hi kan intlansiakna a nih a ngai a, zirna a hmasawn hi Zofate kan dinchhuahna tur a ni.
2. Thawhchhuah mil zela nun kan thiam a ngai. KFC leh iPhone ngaina em em te hi chu mahni a inchawm zo, khawtlangah pawh contribution nei pha kan nih a beiseiawm lain, kan ni lo tlat thin hi a paw a ni. Mahni ke a din a pawimawhzia kan hriat deuh deuh a ngai.
3. Thawh chhuah loh rah seng hi a tawpah chuan tlakranna min thlentu a ni a. Keimahniah a lan loh pawhin kan thlahteah Pathianin a lantir leh tho thin.

Q: IT khawvel intlansiakna chak tak karah hian Zofate dinhmun leh hmabak ni a i hriat te min lo sawi zau sak?

A: Khawvel ram economy hi Tertiary Sector kan tih mai, Service Industry hian a thunun a ni deuh ber tawh a. India ramah ngei pawh kan ram GDP 40% chu Service Sector aṅga kan hmuh a ni a, India ram Service Sector Income 80% vel hi IT industry aṅga lut a ni thung. He'ng te a nih avang hian IT industry hi khawvel ram hruaitute'n an dah pawimawh hle a, India ram ngei pawhin a ngaihlu a ni. IT khawvelah hian Mizote pawhin hma kan sawn ve zel niin a lang a. Kan Engineer te, Computer Science graduate tam takin hmathlir berah an nei chho ṭan niin a lang. Tin, khawvel pumpui economy ṭhan dan en pawhin kan future tak tak hi chu Service Sector-ah a innghat hle a ni.

Mizote pawh IT-ah kan ṭhang mek kan tih lain kan thlakchham pakhat ni a lang chu Technical Skills leh Management Skills kan nei kawp hlei thei lo hi niin ka hria. Engineer thiam tak te, Science Graduate ṭha



| Pic: Kum 2015 IBM International Assignment @UK

tak tak te'n Technical Skills ṭha tak kan neih lain, Management Skills-ah kan hniam a. Chu chuan career growth-ah min tihnufum ṭhin a ni. Management graduate ṭha tak tak te pawh Technical calibre-ah kan hniam leh hret ṭhin a. Chu chuan decision making-ah harsatna tam tak min pe ṭhin niin ka hria. Tunlai khawvelah chuan eng line-ah pawh hmasawn tur chuan Management Skill kan neih tel a pawimawh hle a ni. Programmer/ Developer ringawt Management Skill nei tel lo tan chuan hmasawn theihnaah limit chin a awm tlat zel. Project Director emaw Account Executive hna emaw thleng tūr chuan Technical Skill ringawt a tawh lo ṭhin.

Tin, IT khawvela hmasawn tur chuan khawvelin eng kawng zawngin nge hma a sawn tih ngaihtuah a, eng Technology nge khawvelin a hmatheh tih kan hriat zel hi a ṭul a ni. C, C++, Java, .Net te lar lai chuan he'ng Technology a mithiamte an hlu em em mai a. Tunah chuan Social Networking khawvel-ah kan cheng leh tawh a, Data Science, Cognitive

leh Artificial Intelligence te'n khawvel IT a luah hneh leh hle tawh a. He'ng Technology a mithiam bik te chu an hlu leh hle tawh thung. Engineer Graduate, Science graduate ringawt a tawh tawh lo a, Technology ṭhang mek laiah knowledge kan nei em tih hi a pawimawh hle tawh a ni.

Q. Zoram hian eng nge IT lamah eizawna tlak, company dinna tlak tih theih kan neih ve a i hriat?

A: Kum 2013 khan Pune Mizote'n Chapchar Kùt kan buatsaih a; Pune Mizo Welfare Association-ah Assistant Secretary ka nih ve lai a ni a. Tin, Kùt Organising Secretary ka ni ve bawh a. Chief Minister, Pu Lal Thanhawla hi zanriah kilpuina kan nei a. Hetah hian ka zawt ve a, *"Ka Pu, Mizoram hian IT Company han koh luh emaw, IT Company te tana Special Economic Zone (SEZ) emaw han siamsak chungchang te hi kan ti ve thei ang em?"* tiin ka zawt a. *"Tun dinhmunah chuan kan la thei lo a ni, infrastructure kan la nei lo em a ni,"* tiin min chhang a. Pune a lo zin ṭum hian Mizo ṭhalaite hmathlir tih thu



| Pic: Pune Mizo Christian Fellowship Inkhawm



***Pic:** 2016 Christmas
A fanu Ruthie
Lalremruati leh a
nupui Mavani Ralte
@Pune Mizo Christian
Fellowship*



***Pic:** 2017 Christmas
@Pune Mizo Christian
Fellowship*

ka ziah chu kan CM hi ka lo pe a, a chhiar ve ngei turah ka beisei!

Mizoram economy innghahna tur chu Service Industry a ni a, Human Capital kan neih thatna ber pawh Service Industry a ni. IT/ITES industry hi nei tha ngat ila chuan kan thalai thiam tak tak te'n thla khata Rs. 30,000/- chuang an han hlawh anga, kan ram economy chu khitah a inhlangkai nghal ang. Amaherawhchu, IT company lian te ko lut tur chuan Economic planning fel tak kan neih a ngai a, SEZ emaw special Subsidy emaw kan neih theih a ngai a. Chumi tur chuan uninterrupted Power leh Communication Network tha zawk kan neih phawt a ngai a ni. Tun dinhmunah chuan Consultancy lam hi kan tlin tawka a la nih hmela, IT Service tak tak hi chu kan infrastructure hian a la tlin chiah lo a ni. IT Consultancy din te pawh hi kan tum chuan kan ti thei dawn khawp niin ka hria.

Q: A tawpna ber atan, kan hriat chak em em, Cognizant chu i zawm dawn ta em? Eng nge i hmachhawp te?

A: Pathian zara dam chuan zawm ngei ka tum e. IBM-in min release hma theih loh avangin February thla tawp lamah chuah ka zawm theih hmela. Cognizant lam nen kan inbiakna thar berah chuan Middle-East lama awm tura min duh thu ka dawng a. Amaherawhchu, Middle-East lama awm chu ka la confirm rih thei lo a ni. Ka hmalam hun chu Pathian thu thu a ni e.

MC: A va bengvar thlak teh lul em. In kawmna hun tha tak min siamsak avangin kan lawm e. I hun lo awm zel turah duhsakna sang ber kan hlan a che.

Lawmnakima: Ka lawm e. Min rawn kawm duh a ka lawm e.

SCRUB TYPHUS

(RANNUNG SEH ATANGA NATNA)

-dr. c. vankhuma, MD



Hman deuha ka phone-ah ka thian thenkhat te'n min zawh tak fo mai thil pakhat chu, “VK, rannung chikhat seh avangin mi an thi thei an ti a. Mi seh hlum thei chutiang rannung a awm em ni?” tih hi a ni. Tichuan, “Aw, awm e. Mahse, kha rannung seh vanga thi kha an ni lo a, a natna hrik an pai vang a ni,” tiin ka chhang thung.

A nih leh eng natna nge ni thei ta ang le? Mithiam te sawi dan chuan he natna hi chu ‘Typhus Fever’ emaw ‘Scrub Typhus’ emaw an tih hi a ni. He natna hi hrik kan tih chi hrang hrang, saptaung chuan ticks, mites, etc. an tih te atanga kai theih a ni a. He hrik hian natna hrik (bacteria) chi khat ‘Rickettsia’ a lo pai chuan he natna hi a thlen thei a ni. He natna hrik hi thosin min seh a, malaria hrik kan thisena a lo luha kan lo vei ang tho hian mihring chuan kan lo kai ve thei zawk a ni.

Typhus fever hi kan hre lar lo hle a. Daktawrte pawhin a taka case han enkawl hi a tlem hle a. Hrileng zen zen lo a nih avang hian kan hai foa ni. Typhus fever hi chu Africa, South East-Asia leh South America ram thenkhatah hmuh tam ber a ni thung a. A ram hming emaw a hmun hming emaw ang te hian a hming an phuah thin a ni. Eg., Rocky Mountain spotted fever. Kumin, Mizorama rawn darh thar hi chu ‘Scrub typhus’ kan tih hi a natna thlent u hrik chu bacteria chikhat ‘Orientalsutsugamushi’ vang a ni tlangpui a ni.

He natna hi sawi tawh ang khan rannung seh atanga kai a ni a. A seh hnuhmate hi a na duh em em a, A lo vung a, pan ang deuh reuh hian a awm thin a, a lo char thin a ni (eschar). Tichuan, khua te a tisik a, lu te a nain, thal te a ti toh a, taksa a lo vual sen a, ruh te a na a, hritlang tur ang deuh t ehian an awm thin a ni. Damdawi nena inenkawl vat loh chuan a thihpui ve theih a ni. Tin, Health Department chuan tunah hian NEDP hmangin PHC tinah Scrub Typhus Test Kit hi dah vek a nih theihna’n ruahmanna an siam mek a. Hemi kawnga harsatna nei te tan hun rei lo Leah mahni awmna hnaih ber PHC-ah a thlawnin test a tih theih tawh dawn bawk a ni.


Heti ang hri lenna hmunah kan lo awm a nih chuan, insect killer te hi mahni In bulvela kah that tur a ni a. Zan mut dawna thosilen zar te hi a pawimawh khawp mai. Rannung laka invenna’n a tha hle bawk. Tin, a chung a kan lo tarlan tawh, eng emaw rannungin a seh hnu atanga kan lo dam lo khawsik a, taksa vual te kan nei a nih chuan inentir vat thin tur a ni. Thisen test-tirin, a natna hi a hmuhchhuah ve theih a. Natna hrik vanga awm a nih ang bawkin, anti-biotic bik eg. Doxycycline etc, damdawi hmanga enkawl chuan an dam tha duh hle a ni. He natna hi a lenna hmun bikah lo chuana intai darh zau em em loh avangin khawi khuaah emaw an lo leng a nih pawhin, chi ai a tul lem lo a ni. Malaria te ai hian a la hlauhawm loh zawk daih a. Amaherawhchu, fimkhur taka mahnia lo inbengvar khalh a, a natna chinchang leh a lo lan chhuah dant e, a enkawldan te kan lo hriatlawk hi, inenkawl na tha ber a ni tih hi i hre zel ang u.

MIZO THLALATU HMASA 'LALHEMA' CHANCHIN

-didini tochhawng

A hun laia pa lar tak. Mizote zinga sumdawnna lama pa lar ni bawh leh tun thlenga a thlah kal zel te'na a hming an la chhawm chhawn, Pu Lalhema chanchin tlema zawng tarlang teh ang. British sawrkar awpna hnuaia Labour Corp-ah telin, indopui pakhatnaah (World War I) khan a kal ve a. Hna a thawh that leh huaisen avangin chawimawina te pawh a dawng pha hial a ni. Indopui a zawh hnu, Mizorama a rawn let leh kum 1920 chho bawr vel khan Aizawlah sumdawnna a tan ta a. Kan hriat lar Bata dealer hmasa ber a ni a. Hardware dawr te a siam leh a, a hnu deuhah thlalak dawr a siam leh a ni.

Pu Lalhema hi Mizote zinga thla la hmasa pawl a ni a; eng tik kumah tak nge thla a lak tan erawh hriat theih a ni lo a ni. Mizote zinga thlalakna leh a develop-na hmanrua (chemical) dealer leh distributor hmasa pawl a ni thung. AGFA (Aktiengesellschaft für Anilinfabrikation) thlalakna hmanrua leh May and Baker (thlalak develop-na chemical) te a supply thin a ni. Zoram buai lai, kum 1966-a India ram sawrkarin Aizawl a bomb tum khan Pu Lalhema chenna Dawrpui veng hi a kang chhe nasa lai ber pawl a ni a. Vanduai thlak takin Pu Lalhema'n thlalak lama a sulhnu neih tam tak te leh a bungrua te a chhe tel a. An hun laia thla la thin dang te paw'n an thlalakna hmanrua leh thlalak tam tak te an chan ve bawh a ni. Mizorama a rawn let leh hnua, kum 1973 khan in-register tha lehin, Lalhema fapa Thangridima'n thlalak dawr hi kum 1985 thleng khan a enkawl chhonzawm a. Kum 1984 khan Pu Lalhema hi a boral a ni.



Lalhema.

Photographer: Unknown

Source: Lalrinchhan Fanai, Dawrpui.

LALHEMA CAMERA HLUI: AGFA SOLLY 100.

He camera hi kum 1980-1986 bawr vela Certex company-in AGFA tana an siam a ni a. Lalhema'n a hun hnunung lama a camera neih, tun thlenga an la dah that a ni. He camera hi plastic-a siam niin, 35mm roll film hmang a ni a. Settings a nei tam lo a, aperture hi f/8 niin, shutter speed pathum sunny, cloudy leh bulb/flash mode te a awm a. A speed tak hi a hriat chian theih chiah loh a ni.



LALHEMA KUTHNU TLEMA ZAWNG TE:

Kum 1953-a Prime Minisiter Jawaharlal Nehrua'n Mizoram a rawn tlawh tuma thlalak te hi tu lak ber nge a nih hriat a ni lo a. Amaherawhchu, he'ng thlalak hnungah te hian Lalhema & Sons seal a inchhu a. Hei hian 'Pu Lalhema print a ni ngei awm e' tih a tilang chiang thung a ni.



Visit of Prime Minister Nehru to Aizawl.


Laughing behind him Gladys Evans (Hruadi) to her left Mrs Lloyd, to the right Basil Jones and Mrs Peggy Jones. Gwen Rees Roberts (Tei) with head on one side behind Pu Buchhawna! Nehru dancing on Bawrh Sap's lawn.

Source: Synod Archives



Nehru & Indira Gandhi with District Council members.

Source: Synod Archives




Thangdela te chungkua.
Dawrpui.
March 1953.
Photographer:
Lalhema.
Source:
Sangdeli, Dawrpui.



Nehru at Reid House, shaking hands with Pi Lalziki. Pu Bawichhuaka at his side. To the right, wearing puan is Pu Sainghinga.

Source: Synod Archives



CUISINE

-stanley

Mizote hi kan ei leh inah kan changkang sawtin, hma kan sawn viau a. Sapho ei leh in lampang te kan ching chho zel a. Chumi rual chuan khawchhak lam ei leh in te pawh kan ngaisang chho zel bawk a. Khawvel changkanna leh media lama kan san chhoh zelnain a ken tel te pawh a ni awm e. Hnamdang ei leh in kan ngaihsan rual hian keini MC lam chuan kan Mizo chawhmeh neih sa te leh kan Mizo ka rem zawng te hi belh zel leh chhuan tlaka siam hi kan tih makmawh niin kan hria. Internet lamah te, a en peih tan chuan hnamdang chawhmeh siam dan chu awlsam tea hriat theih a a awm takah hian mahni Mizo ei leh in ngei hi changtlung zawkin han awm ve thei se chuan duhthusam a ni. Pehhel loin kan hriat leh kan ei tawh te hi a then han tarlang dawn the ang.


VAWKSA REP, KHANGHU LEH PHUIHNAM TLAK

Mamawhte:

- Vawksa Rep - Thul 1.
- Phuihnam - Tel 1.
- Khanghu - Tel 2 (A tel a tet theih em avangin).

Siam Dan:

Vawksa rep chu han chhum hang tawp la. A hmin dawn lamah phuihnam leh khanghu i thlak dawn nia.



TELHAWNG DEEP FRY

Mamawhte:

- Telhawng - Kuttum tiat vela tam/mahni duhdana tam
- Tel - I kan bel azirin deep fry-na khawp tur.

Siam Dan:

Tel khan han chhuang sa la. Telhawng hi tel tamah hian a ro repin han deep fry ila, a ut lutuk kha fimkhur chu a t̃ul. A tui dan a dang khawp tur.

BAIBING LEH VAWKSA CHHUMPAWLH

Mamawhte:

- Baibing - Tel 1.
- Vawksa - 1/2 kg (500 g).

Siam Dan:

Vawksa chu a te lamin chan la, baibing nen chhum tawp a ni mai. Hmarcha leh bahkhawr thlak tel hian a titui zual, a duh lo tan a ngai chuang lo.



ANTHUR SEN LEH NGHAPIH/ DANGPUITHU BAI



Mamawhte:

- Anthur sen/Lakher anthur/Chhimbawng - Tel khat.
- Purensen - 1.
- Purunvar - Pum 5.
- Chi - Fiente 2.
- Hmarcha - Duh thak dan azir.
- Ngapih - Antui hawpna fian 1.

Siam Dan:

Anthur chu nghapih nen han chhuang so la; chhuan chhung hian nghapih rim chhuahna'n khuh loh tur. A hmin dawn lamah purun zai lep, purunvar den leh a dang te khi han thlak ila, a tui dan a dangin, a zawngchhang tlak viau a ni.

Recipe te hi Tested and Good Taste Approve vek an ni e – Ed Board.

NATURE WATCH

THLEKTHLEK

Photographed by
Kima Hnamte

Thlekthlek (Daurian Redstart). Scientific Name - Phoenicurus aureus



Kima Hnamte



Kima Hnamte



Kima Hnamte

